

DOMINGU XVI TEMPU KOMÚN – TINAN C

Tema

Leitura sira domingu ne'e nian konvida ita atu reflète tema ospitalidade no akollimentu/simun nian. Ezisténsia sarani mak akollimentu Maromak nian no Ninia proposta sira; no asaun hotu maksi ba maluk nia di'ak, tenke mai husi enkontru loos ho Jezús no husi raronak Jezús nia Liafuan. Ne'e mak permite atu hetan sentidu ba ita-nia asaun no ba ita-nia misaun.

Leitura dahuluk propoin mai ita figura patriarka Abraun nian. Iha figura ne'e apresenta modelu ema ida ne'ebé matan moris ba ema ne'ebé liu, fahe buat hotu nia iha ho maluk ne'ebé liu iha nia dalan no haree iha bainaka ne'ebé tama nia tenda laran, Maromak rasik nia figura/ilas. Nia konsekuénsia mak rekompensa husi Maromak.

Evanjellu apresenta kuadru seluk ospitalidade no akollimentu Maromak nian. Maibé sujere mós katak, ba ema sarani, simu Maromak iha nia uma la'ós tama iha ativizmu, maibé tuur iha Jezús nia ain, rona ninia proposta sira. Iha Nia, mak Aman halo nia proposta mai ita, hodi simu ninia Liafuan.

Leitura daruak apresenta mai ita figura apóstolu ida nian (Paulo), ne'ebé halo Kristu nia liafuan sira no ninia proposta sira referénsia fundamentál ba nia. Ba Paulo, buat ne'ebé nesesáriu mak "simu Kristu", no harii moris tomak hale'u ninia valór sira. Ne'e mak importante liu iha esperiénsia sarani.

LEITURA I – Gen 18,1-10a

Kapítulu 12-36 Livru Génesis nian mak konjuntu ida testu sira ne'ebé la iha unidade no karáker dokumentu istóriu nian eh reportajen jornalístika akontesimentu sira-nian. Fundamentalmente, iha nia laran iha mistura ida "mitu sira kona-ba orjijen" (ne'ebé haktuir oinsá "fundadór" ida to'o iha fatin ida no halo fatin ne'e sai ninian), konjuntu "istória/lenda kulturál" sira no relatu ne'ebé espresa realidade vida la'o-rai/nómada nian durante miléniu daruak molok Kristu.

Testu ne'ebé ohin leitura dahuluk propoin mai ita, mai husi lenda kulturál antiga ida ne'ebé konta figura divina na'in tolu hatudu an ba kananeu ida iha ai-karvallu lulik nia mahon iha Mambré (besik Hebron), oinsá kananeu ne'e simu sira iha nia tenda no oinsá nia simu rekompensa ho oan-mane ida husi maromak sira (Mambré mak santuáriu famozu kananeu husi kedas miléniu datoluk mK, tinan rihun ida molok Abraun to'o iha ne'ebá).

Bainhira Abraun horik iha fatin ne'ebá, lenda antiga Kaná nian aplika fali ba nia no nia mak sai fali ema importante iha enkontru ho figura divina sira. Iha sékulu X mK (reinu Salomão nian), autór jahwista sira rekupera lenda antiga ne'e atu apresenta sira-nia katekeze.

MENSAJEN

Sá loos mak proposta katekétika ne'ebé autór jahwista sira hakarak hato'o, hodi uza "lenda kulturál" antiga ne'e?

Iha estadu atuál testu ne'e nian, personajen sentrá mak Abraun. Nia mak figura ne'ebé katekista jahwista sira apresenta ba israelita sira época Salomão nian, nu'udar modelu ida moris nian no fiar nian.

Testu apresenta Abraun “tuur iha nia tenda nia odamatan iha meiodia boot” (vers. 1). Tekitekir, mane na'in tolu mosu iha Abraun nia oin (vers. 2). Abraun konvida sira atu tama; nia la lori de'it bee atu fase sira-nia ain, maibé prepara mós almosu ho paun ne'ebé foin tunu, ho karau-oan “mamar no di'ak” husi nia balada sira, ho manteiga no susu-been; hafoin, nia hamriik besik sira, iha atitude atan vijilante/matan-moris nian atu buat ida la kuran ba konvidadu sira (vers. 3-8): ne'e mak istória furak ospitalidade nómada nian.

Autór sira apresenta Abraun nu'udar modelu ema íntegru, umanu, laran-di'ak, laran-sadia, matan moris ba ema ne'ebé liu no pronto atu fahe ho nia, ho forma gratuita, buat di'ak liu ne'ebé nia soi. Han hotu tiha, bainaka fó hatene ba Abraun katak nia mehi kle'an liu sei sai realidade: oan-mane ida sei moris ba nia, erdeiru nia uma nian, ida-ne'ebé sei kontinua ninia jersaun/dexendénsia (vers. 9-10). Katekista Jahwista hakarak hateten katak Maromak la husik liu de'it, maibé fó rekompensa ba atitude laran-di'ak nian, gratuidade nian, domin nian.

Testu apresenta mós fiar-na'in ida nia atitude loloos iha Maromak nia oin. Iha relatu tomak maski la hateten se Abraun konxiente ga lae katak Maromak iha hela nia oin, ita haree Abraun nia submisaun ho hakmatek, respeito, konfiansa totál (Sara hamnasa ba promessa, maibé Abraun mantein silénsiu, la hatudu dúvida - vers. 10b-15): sira-ne'e mak atitude fiar-na'in israelita ida tenke asume iha Maromak nia oin, Maromak ne'ebé mai hasoru ema.

Ita-nia atensaun ba mós iha imajen Maromak ida ne'ebé derepente tama iha ema nia moris, aseita atu tama iha ninia tenda no tuur iha meza, hodi forma comunidade ho nia. Imajen ne'e hakarak hatudu signifikadu han hamutuk: kria komuñau, estabelese ligasaun família nian, partilla moris. Katekista jahwista apresenta, maromak ida ne'ebé halo diálogu ho ema, hakarak estabelese tali familiár ho ema no estabelese ho nia istória ida domin no komuñau nian.

Abraun mak modelu fiar-na'in nian: nia mak ida-ne'ebé Maromak bá vizita, simu iha nia uma no tau buat hotu ne'ebé nia soi iha Maromak nia liman, hatudu ho ninia hahalok ninia laran-di'ak, ninia umanidade, ninia konfiansa no fiar; nia mak ida ne'ebé fahe buat ne'ebé nia soi ho ema ne'ebé liu no kumpre didi'ak devér sagradu ospitalidade nian. Realizasaun ba ema nia mehi kle'an liu mak Maromak nia rekompensa ba ida ne'ebé hatudu hahalok hanesan Abraun.

LEITURA II – Col 1,24-28

Ita kontinua leitura Surat ba Kolossense sira ne'ebé ita haree ona iha domingu kotuk. Surat ne'e hanesan hateten ona, Paulo hakerek husi prizaun (iha Roma), hodi konvida makhorik sidade Colossos (Ázia Menor) nian atu keta see tilun ba doutór sira ne'ebé hanorin katak fiar iha Kristu tenke komplementa ho kultu ba anju sira, ho rituál legalista sira, ho prátika axétika rigoroza no hodi observa festa ruma...

Ba Paulo, Kristu mesak de'it mak nesesáriu: ninia moris, ninia sasin iha krús (don moris nian tanba domin) no ninia moris-hi'as. Ita iha tinan sira 61/63 hanesan ne'e.

Testu ne'ebé ohin propoin mai ita hahú parte polémika surat nian. Iha nia laran, Paulo apresenta ninia ezemplu rasik, atu nia sai nu'udar estímulo ba sarani sira Colossos nian.

MENSAJEN

Ezemplu ida-ne'ebé mak apóstolu hakarak propoin ba sarani sira Colossos nian? Ezemplu ida ema ida-nian ne'ebé, hahú husi ninia konversaun, husik buat hotu, halo Kristu referénsia fundamentál no preokupa de'it atu tau nia moris iha Kristu nia servisu.

Iha ninia dalan misionáriu ne'ebé naruk, Paulo terus barak atu lori proposta salvasaun nian ba ema hotu, laho esesaun (kf. 2 Cor 11,23-29). Inkluzive, iha momentu nia hakerek, Paulo prizioneiru hela tanba anúnsiu evanjellu nian. Maski nune'e, apóstolu haksolok tanba hatene katak nia la terus leet de'it, maibé nia terus fó fuan no lori ema barak atu deskobre Jezús Kristu no ninia proposta libertasaun nian.

Ninia terus mós kompleta “buat ne'ebé kuran ba Kristu nia terus, ba ninia isin katak Kreda”. Katak sá? Ba balun, Paulo refere ba uniaun Kreda/isin ho Kristu/ulun: se ulun (Kristu) terus, membru sira mós tenke fahe sorte ne'ebé ulun suporta. Esplikasaun ida-ne'e tau iha relevu uniaun sarani sira-nian ho Kristu no sarani sira entre sira.

Ba sira seluk, Paulo refere ba asaun redentora Jezús nian: Ba Jezús, redensaun signifika krús no don moris nian; se apóstolu sira aseita sai sasin redensaun nian, ida-ne'e implika, mós ba sira, don moris nian (liuhusi persegisaun no sofrimentu). Espliaksaun ida-ne'e tau iha relevu unidade ministériu Kristu nian no apóstolu sira-nian no nesesidade sasin apostóliku. Paulo iha konxiénsia katak nia simu bolun atu haklaken “mistériu” (“mystêrion” – vers. 26). Liafuan ne'e (ne'ebé “Lumen Gentium” foti atu define Kreda no ninia misaun iha mundu – kf. LG 1) hatudu, iha Paulo, planu makso'ik Maromak nian, naksubar iha ema sira ba sékulu barak, revela ho modu nakonu iha moris, iha hahalok no iha liafuan sira Jezús Kristu nian no Jezús nia eskolante sira kontinua (Kreda) iha istória. Paulo (no sarani sira enjerál) nia esforsu mak kontinua apresenta projetu libertasaun ida-ne'e ba ema hotu.

Nune'e, Paulo konvida, Kolossense sira atu harii sira-nia moris hale'u Jezús; ho ninia ezemplu, Paulo estimula sira ba komuñau metin ba beibeik iha Kristu (la'ós iha anju sira, eh iha prátika legalista sira, eh prátika axétika sira) basá, iha Kristu mak sarani sira hetan salvasaun no moris nakonu.

EVANJELLU – Lc 10,38-42

Epizódiu ne'e situa ita iha aldeia (la identifika ida-ne'ebé), iha biin-alin na'in rua nia uma (Marta no Maria). Biin-alin na'in rua ne'e, provavelmente, mak Marta no Maria, Lázaro nia feton sira, refere iha Jo 11,1-40 no Jo 12,1-3. Se nune'e karik, asaun ne'e akontese iha Betânia, aldeia ki'ik ida situa iha laletek parte lorosae Foho Oliveiras nian, besik kilométru tolu husi Jerusalém. Ita kontinua halo “dalan Jerusalém nian”, ho Jezús ne'ebé revela ba ninia eskolante/dixípulu sira Aman nia projetu no prepara sira sai sasin Reinu nian.

MENSAJEN

Ita iha kontestu festa han nian. La dehan se iha konvidadu barak ka uitoan; buat ne'ebé dehan mak husi biin-alin sira ne'e, Marta preokupa loos ho serbisu barak (vers. 40), enkuantu Maria tuur iha Jezús nia ain, rona ninia Liafuan (vers. 39). Marta, naturalmente, la simu situaun ne'e no kesar ba Jezús nia alin nia indiferensa. Jezús nia resposta (vers. 41-42) konstitui sentru relatu nian no fó sentidu ba katekeze ne'ebé iha epizódiu ne'e, Lucas hakarak apresenta mai ita: Jezús nia Liafuan tenke tau aas liu interese seluk nia leten.

Iha testu ida-ne'e, iha detalhe ida ne'ebé presiza hatudu sai: Maria nia pozisaun, katak, "tuur iha Jezús nia ain". Ne'e mak posizaun típika dixípulu ida iha nia mestre nia oin (kf. Lc 8,35; Apóst 22,3). Ne'e mak situausaun surpreendente ida, iha kontestu sosiolójiku ida iha-ne'ebé feto sira iha estatutu subalternidade (iha okos) ho limitasaun ba sira-nia direitu relijiozu no sosiál balun; tanba ne'e mak, laiha "rabbi" ida époka ne'ebá nian aseita feto ida iha grupu dixípulu/eskolante sira-nian ne'ebé tuur iha nia ain atu rona ninia lisaun sira. Lucas (ne'ebé, iha ninia obra haka'as an atu hateten katak Jezús mai liberta no salva ema sira ne'ebé moris iha opresaun no eskravidaun, nomeadamente feto sira) hatudu, iha epizódium ida-ne'e, katak Jezús la halo diskriminasaun naran ida: faktu desizivu atu sai dixípulu mak disposizaun atu rona ninia Liafuan.

Dalabarak, ema lee epizódium ida-ne'e iha roman opozisaun entre asaun no kontemplasaun; la'ós ida-ne'e mak sai kestaun iha ne'e... Lucas iha katekeze ida-ne'e, la esplika katak vida kontemplativa aas superiór liu vida ativa; nia hakarak dehan katak buat ne'ebé importante liu iha fiar-na'in nia moris mak rona Jezús nia Liafuan, basá ida-ne'e mak pontu atu hahú dalan fiar nian. Ida-ne'e la signifika katak "halo sasán sira", "serví maun-alin sira" la'ós importante; maibé signifika katak buat hotu tenke hahú husi rona Liafuan, basá Liafuan ne'ebé ita rona mak dudu ita ba ema seluk no halo ita komprende saida mak Maromak hein husi ita.